

ADDENDA AO CONVENIO DE COOPERACIÓN ENTRE A DEPUTACIÓN PROVINCIAL DA CORUÑA E O CONCELLO DA CORUÑA EN MATERIA DE ANÁLISE E DEFINIÇÃO DE PROXECTOS TIC (TECNOLOXÍAS DA INFORMACIÓN E DAS COMUNICACIÓNS) E DE TRANSFORMACIÓN DIXITAL DA ADMINISTRACIÓN LOCAL, ORIENTADA Á INCORPORACIÓN DA UNIVERSIDADE DA CORUÑA AO CONVENIO

Número 89/2021

Na Coruña, na sede da Deputación Provincial da Coruña

REUNIDOS

Doutra parte, don Valentín González Formoso, en calidade de presidente da Deputación Provincial da Coruña, en representación da mesma e de conformidade coas atribucións que lle confire a Lei 7/1985, do 2 de abril, reguladora das bases do réxime local; e a Lei 5/1997, do 22 de xullo, da administración local de Galicia.

Dunha parte, dona Inés Rey García, alcaldesa-presidenta do Concello da Coruña, actuando en virtude das súas facultades, segundo o establecido na Lei 7/1985, do 2 de abril, reguladora das bases do réxime local; e na Lei 5/1997, do 22 de xullo, da administración local de Galicia.

Doutra parte, don Julio E. Abalde Alonso, reitor da Universidade da Coruña, que actúa en nome e representación da nomeada institución, no uso das atribucións que lle confire o art. 36.1. f) dos seus Estatutos, aprobados polo Decreto 101/2004, do 13 de maio, da Xunta de Galicia, modificado polo Decreto 194/2007, do 11 de outubro, que outorga ao reitor a facultade de asinar convenios en nome da Universidade da Coruña.

Os comparecentes interveñen en uso das facultades que, por razón dos seus cargos, teñen atribuídas e

MANIFESTAN

I.- Que a Deputación provincial da Coruña e o Concello da Coruña formalizaron o 7 de maio de 2021 un Convenio de cooperación en materia de análise e definición de proxectos TIC (tecnoloxías da información e das comunicacións) e de transformación dixital da administración local.

II.- Que o convenio establece as bases de cooperación entre a Deputación Provincial da Coruña e o Concello da Coruña para analizar e definir un proxecto conxunto para a posible creación dun Centro de innovación e servizos dixitais orientado á transformación dixital da administración local, co fin de obter como resultado un proxecto TIC concreto como posible candidatura a presentar para a obtención dos fondos económicos do programa NextGeneration da Unión Europea, englobados no Plan de Recuperación, Transformación e Resiliencia “España PODE”, e dentro do marco España Dixital 2025, da Estratexia Galicia Dixital 2030 e das respectivas Axendas Dixitais e proxectos TIC das entidades participantes.

III.- Que entre as principais liñas de traballo, ademais de definir o citado centro especializado, está a avaliación da súa posible integración na “Cidade das TIC” da Coruña, mediante un

acordo de cooperación para a posta en funcionamento e impulso do mesmo entre a Deputación, o Concello e a Universidade da Coruña. Igualmente, preténdese promover a apertura do devandito centro á incorporación doutras administracións públicas de ámbito local, autonómico e estatal, de forma que se instauren vías de cooperación que permitan aproveitar as sinerxías dos proxectos, do novo polo TIC e da innovación dixital.

IV.- Que a Universidade da Coruña é unha institución que forma parte do sector público institucional á que, de acordo cos seus estatutos, lle corresponde no ámbito das súas competencias, o servizo público de educación superior, mediante a investigación, a docencia e o estudo, incorporando como función ao servizo da sociedade a difusión e valorización da transferencia de coñecemento para o desenvolvemento económico.

V.- Que a Universidade da Coruña está a impulsar a Cidade das TIC como un proxecto estratéxico, onde pretende que se cre un ecosistema TIC dinámico e vangardista que combine múltiples aspectos, espazos, infraestruturas, centros e servizos, e impulsando para iso un polo tecnolóxico TIC de innovación dixital de referencia a nivel nacional e internacional, que actúe como demostrador de tecnoloxías emerxentes, de apoio ao tecido empresarial pola prestación de servizos tecnolóxicos avanzados non dispoñibles en Galicia, que facilite a instalación de empresas do sector e que sirva como vector de crecemento e dinamización económica grazas á creación de *startups*, o impulso da I+D+i, o fomento do emprendemento e a atracción de empresas multinacionais.

VI.- Que a Deputación Provincial da Coruña e o Concello da Coruña consideran de gran interese que a Universidade da Coruña poida cooperar na análise e definición do citado Centro de innovación e servizos dixitais para a transformación da administración local, e a Universidade da Coruña considera de gran interese colaborar no devandito proxecto e na avaliación da súa posible integración na Cidade das TIC como un dos centros especializados de referencia, instaurando vías de cooperación que permitan poñer en valor as sinerxías dos proxectos da administración local, do novo polo TIC e da innovación dixital.

VII.- Que as entidades asinantes están de acordo en que cooperar nas súas iniciativas é moi positivo e comparten a idea de que cabe unha acción coordinada en materia de TIC e para a transformación dixital da administración local, así como en colaborar para tentar obter novos recursos económicos e aproveitar mellor os fondos dispoñibles e os medios cos que conta cada unha das institucións.

VIII.- Nesta relación de cooperación, as entidades asinantes asumen competencias compartidas para o seu respectivo desenvolvemento tecnolóxico, de conformidade co previsto no artigo 25 da Lei reguladora das bases do réxime local (para os municipios, en particular, no seu apartado 25.2 letra ñ), e no artigo 36 da mesma lei para as deputacións provinciais, tanto respecto da transformación dixital como na cooperación no fomento do desenvolvemento económico e social do territorio provincial (apartado 36.1 letra d). Competencias específicas que gardan coherencia e están aliñadas co previsto nos artigos 157 e concordantes da Lei 40/2015, do 1 de outubro, do réxime xurídico do sector público.

Polo que respecta á Universidade da Coruña, os seus Estatutos, aprobados polo Decreto 101/2004, de 13 de maio, e modificados polo Decreto 194/2007, de 11 de outubro, recollen no seu artigo 1.2, entre as súas funcións, "a creación, desenvolvemento, transmisión e crítica da



ciencia, da técnica e da cultura” e “a difusión, a valorización e a transferencia do coñecemento ao servizo da cultura, da calidade da vida, e o desenvolvemento económico”.

Esta acción colaborativa canalizada a través da técnica da cooperación (artigo 144 da LRXSP) e formalizada mediante convenio (artigo 140 da LRXSP), ten a preferencia que lle outorga o artigo 57.3 da Lei reguladora das bases do réxime local a esta vía de cooperación, antes da creación de personificacións administrativas. Resulta, por outra banda, consolidada no Real Decreto-Lei 36/2020, do 30 de decembro, polo que se aproban medidas urxentes para a modernización da administración pública e para a execución do plan de recuperación, transformación e resiliencia, tanto no que se refire aos principios como ás directrices de xestión que se establecen, respectivamente, nos seus artigos 3 e 4.

CLÁUSULAS

Primeira.- Obxecto

A presente addenda ten por obxecto establecer as bases de cooperación entre a Universidade da Coruña, a Deputación Provincial da Coruña e o Concello da Coruña para colaborar na análise e definición dun Centro de innovación e servizos dixitais orientado á transformación dixital da administración local, e avaliar a súa posible integración na Cidade das TIC como un dos centros especializados de referencia, cooperando para poñer en valor as sinerxías dos proxectos da administración local, da Cidade das TIC e da innovación e transformación dixital, todo iso co obxectivo inicial de obter como resultado un proxecto TIC concreto como posible candidatura a presentar para a obtención dos fondos económicos do programa NextGeneration da Unión Europea, englobados no Plan de Recuperación, Transformación e Resiliencia “España Pode”, e dentro do marco España Dixital 2025, da Estratexia Galicia Dixital 2030 e das respectivas Axendas Dixitais e proxectos TIC das entidades participantes.

No texto do convenio quedan definidos o seu obxecto e os dereitos e as obrigas das partes.

Segunda.- Actuacións de cooperación

1.- Achega da Universidade da Coruña

A Universidade da Coruña poñerá ao dispor do proxecto os responsables dos equipos humanos dos servizos tecnolóxicos da entidade e o persoal que fose necesario, e particularmente o persoal do CITIC (Centro de Investigación en Tecnoloxías da Información e das Comunicacions).

2.- Achega do Concello da Coruña

O Concello da Coruña poñerá ao dispor do proxecto os responsables dos equipos humanos dos servizos tecnolóxicos da entidade e o persoal que fose necesario.

3.- Achega da Deputación Provincial da Coruña

A Deputación da Coruña poñerá ao dispor do proxecto os responsables dos equipos humanos dos servizos tecnolóxicos da entidade e o persoal que fose necesario.

O presente convenio non implica achega económica de ningún tipo por ningunha das partes asinantes.

Terceira.- Principais liñas de traballo

- Analizar, avaliar e, no seu caso, definir un proxecto de posta en marcha dun centro nacional de referencia, innovación e servizos dixitais especializado en impulsar a transformación e a modernización da Administración local a nivel estatal e autonómico e, particularmente, no ámbito local da provincia da Coruña.

- Avaliar a posible integración do devandito centro na “Cidade das TIC” da Coruña, mediante un acordo de cooperación para a posta en funcionamento e impulso do mesmo entre a Deputación, o Concello e a Universidade da Coruña, e impulsado inicialmente polos fondos NextGeneration.

- Promover a apertura do devandito centro á incorporación de administracións públicas de ámbito local, autonómico e estatal, de forma que se instauren vías de cooperación que permitan aproveitar as sinerxías dos proxectos, do novo polo TIC e da innovación dixital.

- Definir un modelo de cooperación plena entre os actuais equipos de traballo da contorna dixital da Deputación da Coruña, o Concello da Coruña e a Universidade da Coruña, así como a súa especialización nos procesos e instrumentos necesarios para alcanzar unha total transformación dixital do escenario local, con proxectos e perfís orientados aos obxectivos de transformación, destacando:

- A modernización administrativa e a mellora da eficiencia, da axilidade e da calidade nos procesos e servizos dixitais das entidades locais, fomentando a interoperabilidade provincial.
- A ciberseguridade no ámbito da Administración local e na súa relación coa cidadanía.
- O deseño, implantación e evolución de solucións tecnolóxicas propias partindo das que xa están operativas (SUBTEL, TEDEC, Arquivo Electrónico Provincial, etc.) ou en proceso de desenvolvemento (plataforma dixital do Concello, tarxeta Millennium, aplicación cidadá, etc.), segundo os plans de cada entidade, baixo un modelo de código propio e aberto.
- A definición e seguimento da estratexia TIC da Administración local.
- A posible integración de solucións tecnolóxicas de terceiros para a súa plena aplicación nas entidades locais, e a colaboración con empresas TIC para a implantación de novas solucións para o ámbito local.



- A cooperación, coordinación e impulso do goberno aberto e da inclusión dixital da cidadanía, das pemes e dos autónomos.
- A cooperación dixital interadministrativa no ámbito autonómico e estatal.
- A implantación de solucións de intelixencia artificial e “Big Data” nos procesos de xestión da esfera local.
- A implantación da tecnoloxía e das solucións de “Blockchain” e “Smart Contracts” nos procesos de xestión do ámbito local.
- A mellora na xestión e goberno dos datos locais.
- O impulso das infraestruturas das telecomunicacións locais como habilitadoras necesarias para os servizos dixitais.
- A vixilancia e observatorio permanente das diferentes tecnoloxías e a súa aplicación no ámbito local con proxectos de referencia.
- A integración do Centro na Rede Provincial de Espazos de Traballo Colaborativo da Deputación e a coordinación cos centros de “coworking” xa existentes, tanto no Concello da Coruña como no resto da provincia, contribuíndo ao seu apoio, seguimento e asistencia técnica xeral e tecnolóxica para impulsalos e afianzalos no tempo.
- O impulso, captación e xestión de proxectos de transformación dixital dentro do marco europeo de financiamento (2021-2027).
- A creación dun espazo de demostración e experimentación en tecnoloxías disruptivas no ámbito local.
- A elaboración de programas para favorecer o crecemento do sector TIC provincial e de fomento da cohesión económica e social, reducindo a fenda dixital.
- Os programas de capacitación dixital do persoal público.
- Os programas de formación destinados a elevar o coñecemento por parte da cidadanía dun uso seguro das TIC.
- Os proxectos e eventos destinados a socializar as TIC e a súa utilización entre a poboación, facéndoa partícipe e facilitando o uso intensivo pola mesma.

Cuarta.- Resultados da cooperación

De conformidade co establecido no artigo 49. c) da Lei 40/2015, os resultados obtidos como consecuencia do desenvolvemento deste convenio serán titularidade das administracións e institucións asinantes, serán compartidos e postos ao dispor das entidades e das demais que se vaian adherindo.

Quinta- Alcance e difusión do convenio

A subscrición do presente convenio non supón relación laboral contractual ou de calquera outro tipo entre as persoas externas que poidan colaborar nas actividades necesarias para o seu desenvolvemento da Universidade da Coruña, da Deputación Provincial da Coruña ou do Concello da Coruña, de tal modo que non se poderá esixir a estas entidades ningún tipo de responsabilidade, nin directa nin subsidiaria, polos actos ou feitos acaecidos no desenvolvemento do mesmo.

A Universidade da Coruña, a Deputación Provincial da Coruña e o Concello da Coruña fixarán as accións de comunicación e difusión dos contidos e accións comprendidas no presente convenio, así como a súa presentación pública, a través dos seus respectivos gabinetes e responsables de comunicación.

O texto do convenio, unha vez asinado, será publicado nas respectivas sedes electrónicas das devanditas entidades.

Sexta- Vixencia e modificación

O presente convenio de cooperación terá unha vixencia de catro anos, contada a partir da data da súa sinatura, salvo denuncia expresa de calquera das partes cunha antelación mínima de tres meses á data do seu vencemento.

En calquera momento antes da finalización do prazo previsto no apartado anterior, os asinantes poderán acordar unanimemente a súa prórroga por un período de ata catro anos adicionais ou a súa extinción.

A modificación do texto do convenio requirirá acordo unánime dos asinantes.

Sétima.- Extinción do convenio

De conformidade co establecido no artigo 51 da Lei 40/2015, de 1 de outubro, do réxime xurídico do sector público, o presente convenio extinguirase polo cumprimento das actuacións que constitúen o seu obxecto ou por incorrer en causa de resolución. Son causas de resolución:

- a) O transcurso do prazo inicial de vixencia de catro anos do convenio sen terse acordado a prórroga do mesmo.
- b) O acordo unánime de todos os asinantes.
- c) O incumprimento dos deberes e compromisos asumidos por parte dalgún dos asinantes. Neste caso, calquera das partes poderá notificar á parte incumplidora un requirimento para que cumpra nun determinado prazo cos deberes ou compromisos que se consideran incumplidos. Este requirimento será comunicado ao responsable do mecanismo de seguimento, vixilancia e control da execución do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e se entenderá resolto o convenio.
- d) Por decisión xudicial declaratoria da nulidade do convenio.
- e) Por calquera outra causa distinta das anteriores prevista no convenio ou en outras leis.

Oitava.- Confidencialidade. Garantías técnicas

As partes garantirán a plena confidencialidade dos datos e da información obxecto deste convenio, en particular á referida aos datos de carácter persoal, de conformidade co disposto na Lei Orgánica 3/2018, de 5 de decembro, de protección de datos persoais e garantía dos dereitos dixitais, así como no Regulamento (UE) 2016/679 do Parlamento Europeo e do Consello, de 27 de abril de 2016, relativo á protección das persoas físicas no que respecta ao tratamento dos seus datos persoais e á libre circulación destes datos; e se obrigan a establecer os mecanismos técnicos e informáticos necesarios e convenientes para evitar ouso indebido dos mesmos, así como a súa consulta ou copia non autorizada, fixando procedementos, métodos e controis apropiados. Os prestadores de servizos de certificación admitidos deberán cumprir ademais as obrigas da Lei 59/2003, de 19 de decembro, de firma electrónica.

Novena.- Natureza do convenio

O presente convenio réxese pola Lei 40/2015, de 1 de outubro, do réxime xurídico do sector público, e os seus efectos se rexen polo establecido nas súas cláusulas, na citada Lei 40/2015 e demais normativa de aplicación.

Corresponderalle aos órganos da Xurisdición Contencioso-Administrativa, segundo a distribución de competencias disposta na Lei 29/1998, de 13 de xullo, reguladora da dita

xurisdición, o coñecemento das cuestións litixiosas que poidan xurdir como consecuencia do presente convenio.

Décima.- Control da execución do convenio

Constituirase unha Comisión de seguimento, vixilancia e control da execución do presente convenio e dos compromisos adquiridos polos asinantes, en virtude do establecido no artigo 49. f) da Lei 40/2015. A dita comisión estará integrada por dous representantes de cada unha das institucións e resolverá os problemas de interpretación e cumprimento que poidan xurdir respecto do convenio.

Faise constar que a presente addenda foi aprobada por Resolución da Presidencia da Deputación da Coruña número 28563 de 2 de xullo 2021 e por Resolución do concelleiro de Economía, Facenda e Réxime Interior da Coruña número 15269 de 6 de xullo de 2021.

E, en proba de conformidade, as partes comparecentes asinan en exemplar cuadriplicado o presente convenio, no lugar e na data indicados no encabezamento.

**Polo Concello da Coruña,
Na Coruña, a de decembro de 2021
A alcaldesa**

**Pola Deputación Provincial da Coruña,
Na Coruña, a 03/12/2021
O presidente**

Inés Rey García

Valentín González Formoso

**Pola Universidade da Coruña,
Na Coruña, a 03/12/2021
O reitor**

Julio E. Abalde Alonso